

Kart daa bzej Páblona' na' bseleen lao ben'ka' nonlilall' Jesucrítona' yell Rómana'

¹ Nad' Pablo, nak' wen llin che Cristo Jesúza'. Chioza' gox wñabe' nad' gak' postl che', na' bene' lall' na' wi'a dill' wen dill' kob che'na' ² cheyi daa bchebe' gone', na' dii ben'ka' wdixjee daa golle' legake' kani'yi bzejgake'n lee Cho'a Xtilleena'.

³⁻⁴ Na' cho'en dill' che Xiine' Jesucrítona', beena' nak Xancho, daa goke' benech, na' goke' xiin dia che dii rey Davina'. Na' Espíritu Sántona' bli'e nan nake' Xiin Chioza', beena' nak ben' yel' wak choo yel' wak xen daa bibane' ladj ben' wetka'.

⁵ Na' daa nonlilall'nto' Jesucrítona', Chioza' ba goklene' neto', na' nzoe' neto' naknto' postl che Jesucrítona', na' bene' lall' na'nto' lljtixje'nto' xtilleena' kwenche doxen yell-lioni soa ben' gonlilall'gake'ne' na' wzenaggake' che', na' sho'e balaanq. ⁶ Na' lenle ba gox wñab Chioza' kwenche gakle lall' na' Jesucrítona'.

⁷ Chzej' yog'lol-le, le' lle'le yell Rómana', le' ba gox wñab Chioza' nakle lall' nee na' chakile' le'. Xacho Chioza' na' Xancho Jesucrítona' gaklenshgagake' le' na' wzoagake' le' mbalaz.

⁸ Zigaate nia' le', ni cheyi daa ben Jesucrístonan' chak wi'a Chioza' yel' choxken che yog'loltele, la' doxen choe' ben' dill' ba nonlilall'le Jesucrítona'.

⁹ Chios, beena' chon' xshine'na' do yichj do lallaas daa chyixji'a dill' wen dill' kob che Xiine'na', nez

nle'ile' tlizi chñabidee gaklene' le' kat' choe'lwillee.
10 Na' toshiizi chñabidee wi'e latj yidwia' le', na'
 shi cheenile' yid', lekze' kwee xnezin. **11** Le chzel-
 lalla yidwia' le' na' we'len' le' dill' daa gaklenan
 le' soachechchle gonlilall'chle Jesucristona'. **12** La'
 cheenid' wtipch lall' ljwellcho daa nonlilall'chone'.

13 Le' ben' bish' na' le' ben' zan', cheenid' inezile zan shii ba goklalla yidwia' le' per axt naa bikzan' gakan. Cheenid' yidwia' le' kwenche gakchachle gonlilall'le Jesucristona' na' soach ben' gonlilall'gake'ne' ladjlena', ka ba gok che ben'ka' bi nak ben' Israel yellka' gana' ba wyaa. **14** Nezid' chonan byen we'len' yog' ben' xtill' Cristona', ka ben' griego na' ka ben' bi nak ben' griego, ka ben' sin' na' ka ben' bi nteyi. **15** Daan, cheenid' lekzka' chixje'id' le' dill' wen dill' kob che'na', le' zoale Rómana'.

16 Bi chiyii chido'id' wi'a dill' wen dill' kob che Jesucristona', la' nsa'n yel' wak che Chioza' kwenche yislan nottez ben' gonlilalleene', zigaate ben' Israelka', na' lekzka' ben'ka' bi nak ben' Israel. **17** Na' dill' wen dill' kob che'na' chliin cho' nakan goncho yiyakcho ben' li ben' shao' lao Chioza'. Na' chzajniin cho' chiyal' gonlilall'chone' na' bich bi de sto dii gaklenan cho'. Kon ka na Cho'a Xtilleena': "Beena' nak ben' li ben' shao' daa nonlilallee nad', beenan' ibane".

18 Yel' zak'zi che Chioza' za'n yabana' ni che ben'ka' bi chzenag che' na' chongake' chiya dii mal, diika' chsej chllongakan gombia'gake' daa nak dii li. **19** Daa cheeni Chioza' inezgakile' che', ba nezkzgakile'n, la' Chioza'kzan ba bliile'n legake'. **20** La'kzi bi chle'icho Chioza', chle'icho diika' bene'

na' chakbe'icho ka nake'. Daa bxe bsile' yellioni nakbia'cha nake' Chios na' yel' wak che'na' biga te cheyin. Na' bibi de dii wda'i ben' inagake' bi nezgakile' shi zoe'. ²¹ La' la'kzi nezgakile' zoa Chioza', bi choe'la'ogake'ne' ni bi choe'gake'ne' yel' choxken. San yoolə yichjgake' diika' bi zakii na' nchol nniti yichjlall'do'eka' daa bi ntegakile'. ²² La'kzi nazgake' nakgake' ben' sin', daa chongake' chli'n nakgake' ben' bi nteyi. ²³ Lwaa dii nan koogake' Chioza' balaan, beena' biga te cheyin, lwaa lsak' beñechalə, ben'ka' chde cheyin, wloogake' balaan, na' axt no lwaa lsak' ba ze xan yabana', na' lwaa lsak' ba zoa tap ni'a na'yin, na' lwaa lsak' ba chxob le'in.

²⁴ Na' daa chongake' ka', Chioza' ba wchoonlallee legake' kwenche gonchgake' dii zbanka' cheeni beli chen che'ka', na' benlen ljwellgake' diika' nak zban. ²⁵ Lwaa dii nan shajle'gake' daa nak dii li che Chioza', wyazlall'chgake' daa nak de wxiye'. Be'la'ogake' diika' bxe bsil Chioza' na' wloogake'n balaan lwaa dii nan koogake' le' balaan daa bxe bsile' legakan na' chidolee we'la'ochone' toshiizi. Kan' nakan.

²⁶ Daan, Chioza' ba wchoonlallee legake' kwenche gonchgake' dii zbanka' cheeni beli chen che'ka', na' axt noolka' chiyat'len ljwell noolgake' na' chongake' daa bi noe' Chioza' latj gongake'. ²⁷ Na' ka'kzə ben' byoka', lwaa dii nan soalengake' noolə, chibalgakile' chiyat'len ljwell ben' byogake', na' chonlen ljwellgake' daa nak dii zban. Na' chzak'zi'len beli chen che'ka' yel' zak'zi'na' daa chidol'gake' daa chongake' dii malka'.

²⁸ Na' daa bi goklall'gake' wzenaggake' che

Chioza', wlej yichje' legake' kwenche gontegagake' dii mala' kon ka nan loo yichjlall'do'eka' daa nxinj. ²⁹ Shgal' dii bi yejni'alallii chongake', choe'gake' cho'a xbayi beli chen che'ka', chzelall'gake' gat' kwe'gakile', chibagakile' gongake' dii malka'. Nakgake' ben' xe' ben' xga', ben' wen xya, ben' wishagdilə, ben' wxiye', ben' chibayi gon mal che ben', ben' wiçhitj dill', ³⁰ ben' chyilj chzan xtill' ben', ben' chakzbani Chioza', ben' bibi nalli, ben' cha'sibə na' ben' chshalj chshon. Chiyiljlall'gake' bi dii mal gongake', bi chzenagagake' che xaxna'gake', ³¹ bi ntegakile', bi chongake' daa chchebgake', bi chakgakile' ben', ni bi chiyesh'gakile' ben'. ³² La'kzi nezgakile' ba bchhoglo Chioza' chiyal' guet ben'ka' chon ka', zizikchli chongake'n, na' axt chiba chizak'gakile' kat' chon ben' yoblan.

2

¹ Na' li' naa, nottezə nako', kat' chchoglo' che ben' nape' dol' lao Chioza', lekzka' che kwinon' chnjo', la' lenkzo' chono' diika' chongake', na' bibi de wda'ilō'n ino' bibi xtoloo de. ² Na' nezicho Chioza' chone' kon ka chiyal' gone' kat' chchogloe' sak'zi' ben'ka' chon dii malka' nak ka'. ³ Na' li' no' che ben'ka' chon dii malka' napgake' dol', bi gakzilo' wilō' lo yel' zak'zi' che Chioza', la' ka'kzan chono'. ⁴ ¿Achakzilo' bi wsak'zi' Chioza' li' ni che daa chono'? ¿Abi chakbe'ilo' ni che yel' ben' wen che'nan' chiyesh'lallile' cho' na' chape' yel' chxenlall' checho, daa cheenile' yiayj yilenicho che dii malka' choncho? ⁵ Per daa nako' yichjlall'do' chech na' bi cheenilo' yiayj yilenilo', kwintezo'

chkwa' chti'azo' yel' zak'zi'ka' illaglo' kat' illin lla wchoglo Chioza' che ben' kon ka chiyal' gone'. ⁶ La' Chioza' gone' ka gak che to to ben' kon ka chidolee. ⁷ Ben'ka' zoatezi zoagake' chongake' daa nak wen kwenche sho'gake' balaan, wi'e yel' mban chegake' zejli kan'i na' biga llia ile'gakile' yel' wita'. ⁸ Na' ben' yaalall'ka', ben'ka' chzoagake' ka'lə daa nak dii li na' nogake' diika' bi yejni'alallii, wsak'zi'e legake' daa le chllee legake'. ⁹ Yel' zak'zi' wal yen ile'i yog' ben'ka' chon dii mala', zigaate ben' Israelka' na'tech ben'ka' bi nak ben' Israel. ¹⁰ Per ben'ka' chon dii wanna', sho'gake' balaan na' soagake' mbalaz, zigaate ben' Israelka' na'tech ben'ka' bi nak ben' Israel.

¹¹ La' Chioza', tlap chone' yel' joschis, aga nakzi ben' chakile'. ¹² Yog' ben'ka' bi nombia' ley daa bzej dii Moiséza' kwiayi'gake' shi bengake' dii mala', la'kzi bi nezgakile' daa nan. Na' yog' ben'ka' ben dii mala' na' neztekakile' daa na leya', choglo chegake' kon ka na leya' gak chegake'. ¹³ La' kono yiayak ben' li ben' shao' lao Chioza' daa nombia'ze' leya', san beena' chon kon ka nan, len' yiayake' ben' li ben' shao' lawe'na'. ¹⁴ Ka nak ben'ka' bi nak ben' Israel na' bi nezgakile' bin na ley che dii Moiséza', shi tobialozgake' chongake' ka na leya', nakbia' yoo to ley loo yichjlall'do'eka'. ¹⁵ Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bengake'. ¹⁶ Kan' gak llana' gon Chioza' lo na' Jesucristona' wchoglo' che diika' yoo loo yichjlall'do' ben' yell-lioni, kon ka na dill' wen dill' kob che'na' daa cho'a dill'.

¹⁷ Na' li' nako' ben' Israel, chakilo' nako' ben' wen lao Chioza' daa nezilo' daa na ley che dii Moiséza' na' chep cha'laloo daa nombi'o Chioza'.
¹⁸ Chakilo' nezilo' daa cheeni Chioza' gono' daa chli' chsedi leya' li' gono' daa nakch wen.
¹⁹ Chakilo' wak koo ben' lo nez li che Chioza' na' gaktio' ka beeni' lao ben'ka' chda lo yel chol'a'.
²⁰ Na' chakilo' wak wzajniilo' ben' bi nteyi na' wakte wli' wsedilo' ben'ka' bin' shajni'yenii daa nombi'o leya' daa nsa' do ka nak yel' chajnii na' daa nak dii li. ²¹ Na' shi li' chli' chsedilo' ben' yoblə, ¿berache bi chli' chsedi kwino'? Na' shi chsedilo' ben' bi kwane', ¿berache li'lə chbanzo'? ²² Na' li' chsedilo' ben' bi chiyal' soalene' nool bi nak nool che', wa ben' byo ben' bi nak ben' che', ¿berache li'lə chonzo' ka'? Na' li' chwiilo' lwaa lsak' diika' choe'la'o ben', ¿berache chzi' chbanzo' bi de loo lill xlatjinka'? ²³ Chshalj chshono' daa nombi'o leya', per chnit chdio' Chioza' daa bi chono' ka nan.
²⁴ Dii liyen'nan na Cho'a Xtil' Chioza': "Ben'ka' bi nak ben' Israel chnegake' zban che Chioza' ni chele daa chonle mal."

²⁵ Dii li sen daa le circuncisión daa yoo kwerp cho'na' zak'kzin shi chzenago' daa na leya', per shi bi chzenago'n bibi zjanayi daa yoo sena'. ²⁶ Na' shi beena' bi yoo sena' chone' ka na leya', lao Chioza' nake' ka ben' yoo sen. ²⁷ Na' beena' chon ka na leya' la'kzi bi yo'e sena', yili'e lawo' napo' dol' daa bi chono' ka na leya' la'kzi nombi'on na' yootio' sena'. ²⁸ Bi gakzilo' nako' dowalj ben' Israel daa chono' yog' diika' yooloch choncho cho' ben' Israel, ni daa yoo kwerp cho'na' sena'. ²⁹ San dowalj ben' Israel nak beena' nonlilall' Chioza' do

yichj do lallee, na' daa ba bikob Espíritu che'na' yichjlall'do'ena' nakan ka senna' daa chli'n nake' lall' na' Chioza'. Na' che beenin we' Chioza' xtillee chone' wen, aga ben' yell-lionin.

3

¹ Na' ¿bera yel' goklen che ben' Israelka' de? Na' ¿bera banez si'gake' daa yoogake' señ daa le circuncisióñ? ² Dii xen wal banez chegake' de. La' zigaate, legaken' be' Chioza' Cho'a Xtilleena'. ³ ¿Anti chakile ni cheyi daa bi chajle' bal ben' Israelka' che', ba wlej yichje' legake'? ⁴ ¡Bi nakan ka! Chioza' toshiizi chone' ka ba bchebe' gone' la'kzi yog' ben' yell-lioki nakgake' ben' wxiye'. Cho'a Xtilleena' nan:

Daa nchogbi'o gak che ben' saaxyana' nakbia'chan zejan shli,
na' gakbe'gakile' chono' yel' joschis kon ka chiyal'
gakan.

⁵ Na' shi dii mala' choncho chli'n Chioza' nake' ben' li ben' shao', ¿bera inacho, lla? ¿Ainacho Chioza' bi nake' ben' wen daa chsak'zi'e ben'ka' chon mal? (Nia' ka' daa chaki ben' yell-lioki ka'.) ⁶ Per ¡bi nakan ka! La', shel'ka' Chioza' bi nake' ben' li ben' shao', aga wak gone' yel' joschis che ben' yell-lioni.

⁷ Na' zoa ben' nagake', shi yel' wxiye' chechona' chli'n yel' li che Chioza' na' chisgolan balañ che'na', ¿bic̄he naze' nakcho ben' saaxyá, shka'? ⁸ Na' daa chakgakile' ka', wnaljagake': "Goncho dii mala' kwenche sho'che' balañ." Zoa ben' nagake' kan' chli' chsedinto', per bi nakan ka'. Na' ben'ka' naz ka' chidol'gake' yel' zak'zi' che Chioza'.

⁹ ¿Nakra lla? ¿Anakchnto' neto' ben' Israel ben' wench aga ka ben' yoblə, lla? ¡Bi nakan ka! La'

ba wniakz' yog'cho, ka neto' ben' Israel na' ka'kzə
 ben'ka' bi nak ben' Israel, toz ka napcho dol' lao
 Chioza' daa ba bencho dii mala'. ¹⁰ La' Cho'a Xtil'

Chioza' nan:

Kono ben' li ben' shao' zoa, ni tlishee.

¹¹ Ni to ben' bi chajniile' daa nak dii li,
 ni kono zoa ben' chiyilj Chioza'.

¹² Yog'z ben' ba wlaagake' lo nez lina',
 na' yog'zgake' nxinj yichjlall'do'eka'.

Ni togagake' bi chon dii wen.

Ni tlish' ben' chon wen bi zoa.

¹³ Ka zban chla'to loo ba che ben' wet dii nyalj, kan'
 nak dill' zbanka' chchej cho'a lolleeka'.

Kon cho'a lolleeka' chziye'gake'.

Na' ka yierb che bel nak dill'ka' choe'gake'.

¹⁴ Lillinzə chyishjgake' bia' blag' che ben' na'
 choe'gake' dill' zi'bia'.

¹⁵ Bi nallgakile' chittegzgake' ben'.

¹⁶ Gattezə zejgake' chlliayi' chliadegake' na' ch-
 googake' yel' zi' yel' yesh'.

¹⁷ Bi nombia'gake' bi daa ne' soalengake' ben'
 mbalaz.

¹⁸ Bi chall chllebgake' gon Chioza' xya chegake'.

¹⁹ Na' nezicho ben'ka' nagake' chongake' daa na
 ley che Chioza' chiyal' gongake' doxen ka nan.
 Na' daa kono gok gonan, ba bchoglo Chioza' che
 yog'lolcho, cho'ben' yell-lio, ka neto' ben' Israel na'
 ka ben' bi nak ben' Israel, napcho dol', na' ni to
 kono gak ina: "Bibi dol' nap'." ²⁰ Daan, ni to ben'
 bi gak ine' nake' ben' li ben' shao' lao Chioza' daa
 chone' ka na leya'. La' leya' chonan ka chakbe'icho
 nakcho ben' saaxyta.

21 Na' ŋaa Chioza' ba bliile' cho' nakan goncho kwenčhe yiyakcho ben'li ben'shao' lawe'na', na' aga daa goncho ka na leya'. La' ka leya', na' ka diika' bzej dii ben'ka' wdixjee daa goll Chioza' legake', toz ka choe'gakan dill' čheyin.

22 Chioza' ne' yog'lol ben'gonlilallee Jesucrístona' yiyake' ben'li ben'shao' lawe'na', nottezə nake'.

23 La' yog'lolzə ben'bxiñj blengake' na' ni to kono nak dowalj ben'wen ka nak Chioza'. **24** Per daa nak Chioza' ben'wen, chiyone' ben'ben' li ben'shao' daa wdixj Cristo Jesúza' saaxya che'ka', na' bibi zak'gakile'n. **25** Chioza' bselee Crítona' blalj xchene'na' na' wite' ni che saaxyaka' bencho. Na' ni che xchene'na', nottezə ben'gonlilalleene', Chioza' yizi'xene' saaxya che'na'. Na' ka' chli'e nan nake' ben'chon daa nak shli. La' daa nape' yel'chxenlall', bene'ka'z saaxyaka' ben ben'kana' bin'wselee Crítona'. **26** Na' ŋaa, daa bselee Jesucrístona' chli'e nake' ben'chon daa nak shli daa ne' nottezə ben'gonlilallee Jesúza' nake' ben'li ben'shao' lawe'na'.

27 Kono gak wshalj wshon inñe' nake' ben'li ben'shao' lao Chioza' ni che ba bene'ka na leya'. La' aga no chon doxen ka nan, san Chioza' ne' nottezə ben'gonlilallee Crítona' nake' ben'li ben'shao' lawe'na'.

28 Na' ba ŋezicho chiyakcho ben'li ben'shao' lao Chioza' daa chonlilall'cho Jesucrístona' na' aga daa choncho daa na leya'.

29 ¿Achakile Chioza' nake' Chios che to ben'Israelka'zə? ¡Bi nakan ka'! Lekzka' nake' Chios che ben'ka' bi nak ben'Israel'. **30** La' toz Chiozan' zoa, beena' chiyone' ben'li ben'shao' ben'ka' chonlilall' Crítona'. Na' toz ka chone' che nottezə

ben' chonlilalleene', ka ben' Israel, ben'ka' yoo sen
daa le circunción, na' ka ben' bi nak ben' Israel.
³¹ ¿Achakile daa chonlilall'cho Jesúza' chzoacho leya'
ka'lè? ¡Bi nakan ka! La' nezicho nakan to dii zakii.

4

¹ ¿Bera ka inacho che dii xozxto'cho Abrahama'?
Nak gok biyake' ben' li ben' shao' lao Chioza'.
² Shel'ka' biyak dii Abrahama' ben' li ben' shao' lao
Chioza' ni cheyi diika' bene', zaklja bshalj bshone'
lao ben' yell-lioni, per aga lao Chioza'. ³ La' Cho'a
Xtill' Chioza' nan: "Dii Abrahama' wyajli'e che
Chioza', na' Chioza' wne' nake' ben' li ben' shao'
lawe'na'." ⁴ Kat' to wen llin chkaa laxje', bi nakan
to dii chzani ben' cho'ene', san nakan dii chiyal'kz
wi'ene'. ⁵ Per shi to ben' shajli'e che Chios, beena'
chiyon ben' saaxyana' ben' li ben' shao', Chioza'
ile'ile'ne' ben' li ben' shao' daa gonlilalleene', la'kzi
bibi bene' kwenche idolee yel' goklen che Chioza'.
⁶ Dii Davina' bi'e dill' che yel' mbalaz che beena'
na Chioza' nake' ben' li ben' shao' la'kzi bibi bene'
kwenche bdolile'n. ⁷ Ki wna dii Davina':
Chakomba beena' ba biyakxen xtoleena',
na' ba biyol binit saaxya che'na'.
⁸ Chakomba beena' bi yizi' Xancho Chioza'ne'
kwent.
⁹ ¿Achakile to ben'ka' yoozgake' sen daa le circun-
cisión wak soagake' mbalaz? Bi nakan ka', san
lekska' ben'ka' bi yoo seña' wak soagake' mbalaz.
La' ba wniakz' Chioza' wne' dii Abrahama' goke'
ben' li ben' shao' lawe'na' daa wyajli'e che'. ¹⁰ Na'
¿batran wna Chioza' ka'? ¿Aba wyoo dii Abra-
hama' seña' kana' wna Chioza' nake' ben' li ben'

shao'? ¿Awa bin' sho'en? Chioza' wne' ka' kana' bin' sho'en. ¹¹ Na'techlə wloo kwine' sen daa le circuncisión na' seṇna' bli'n ba nake' ben' li ben' shao' lao Chioza' daa benlilalleene'. Daan, dii Abrahama' nake' xozxto' yog' ben' nak ben' li ben' shao' lao Chioza' daa nonlilall'gake'ne', la'kzi bi yoogake' seṇna'. ¹² Na' dii Abrahama' lekzka' nake' xozxto' neto' yoonto' sen daa le circuncisión. Per aga daa yoonto' seṇna'zan, san daa nonlilall'nto' Chioza', beena' ba nonlilall' dii Abrahama' kana' zi' sho'e seṇna'.

¹³ Chioza' b̄chebe' gaki che dii Abrahama' len xiin dia che'ka' doxen yell-lioni. Na' b̄chebe' wi'en legake' aga daa bengake' doxen ka na ley che dii Moisézan', san daa benlilall' dii Abrahama' Chiozan', wna Chioza' nake' ben' li ben' shao' lawe'na'. ¹⁴ La' shel' to ben'ka' chonz ka na leyan' gaki chegake' daa b̄cheb Chioza' wi'e dii Abrahama', bibi zjanayin gonlilall'cho Chioza' na' aga bi zakii daa b̄chebe' gone', shel'ka'. ¹⁵ Leya' nsa'n yel' zak'zi' che ben'ka' bi chon ka nan. Per shi bibi ley de, aga bi de dii inan napgake' dol'.

¹⁶ Ka nak daa b̄cheb Chioza' gone' che dii Abrahama', nakan to goklen daa chone' che nottez ben' nonlilalleene' kwenche yog'zə xiin dia che'ka' ikaagake' daa we' Chioza' legake'. Bi nakan che to ben'ka' chonz ka na leya', san lekzka' nakan che nottezə ben' chonlilall' Chioza' ka benlilall' dii Abrahama' le'. La' dii Abrahama' nake' xozxto' yog'cho cho' nonlilall'chone'. ¹⁷ Ka na Cho'a Xtil' Chioza': "Ba nzoa' li' kwenche gako' xaxna' ben' zan inlleb." Na' Chioza', beena' benlilall' dii Abrahama', nape' yel' wak yisbane' ben' wetka' na' wxe wsile' diika' bin' gak.

¹⁸ Kana' bich non dii Abrahama' lez soa xiine', wyajli'e daa goll Chioza'ne' na' bene' lez gak ka golle'ne'. Ka' gok biyake' xozxto' ben' zan in-lleb, kon ka goll Chioza'ne', chi'e: "Kan' shesh shan xiin dia cho'ka'." ¹⁹ Biga gokchoplallee che Chioza', la'kzi chakbe'ile' ba nake' ben' golə par soa xiine', la' ba zoa gakile' to guiyoa yizan. Na' ni bi gokchoplallee la'kzi gok dii Sárana' nool will. ²⁰ Bi gokchoplallee, san zizikli benlilallee gak daa bc̄heb Chioza' gone' na' be'laweene'. ²¹ La' wñezile' kwasłol Chioza' nape' yel' wak kwenche gone' yog' diika' chchebe'. ²² Daan ble'i Chioza'ne' ben' li ben' shao' daa wyajli'e che'.

²³ Na' daa nan "Chioza' ble'ile'ne' ben' li ben' shao'", aga che tozen' nan ka', ²⁴ san lekza' cho'en dill' checho cho' nonlilall'cho Chioza', beena' bis-bane' Xancho Jesucrístona' ladž ben' wetka', la' lenchon chle'i Chioza' ben' li ben' shao' daa nonlilall'chone'. ²⁵ Bzani Chioza' Xancho Jesucrístona' wite' ni che saaxya chechoka' na' bis-bane'ne' ladž ben' wetka' kwenche biyakcho ben' li ben' shao' lawe'na'.

5

¹ Chioza' ba biyone' cho' ben' li ben' shao' daa ba nonlilall'chone', na' ba bizoalenchone' wen daa wit Xancho Jesucrístona' ni checho. ² Na' daa ba nonlilall'cho Crístona', Chioza' toshiizi chonile' cho' wen na' chibaicho daa noncho lez lljazoalen-chone'. ³ Na' aga to dgazan yibaicho, san lekza' yibaicho yel' zak'zi'ka' chle'icho yell-lioni, daa nezicho chongakan ka soachechcho gonlilall'chone'.

⁴ Na' shi zoachechcho chonlilall'chone' shlak chlla-glocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'. ⁵ Na' ka nak daa noncho lez, bi te bi la ki gakan, la' Chioza' ba bliile' cho' yel' chaki che'na' daa ba nzoe' Espíritu Santo che'na' loo yichjlall'do'choni.

⁶ Kana' ni nakcho ben' wen dii mal na' aga bi gok goncho kwenche bi kwiayi'cho, kana'yen' bid Crítona' wite' ni checho cho' nakcho ben' saaxya. ⁷ Aga ga zoa to ben' lii izanteyi kwine' guete' ni che to ben' nak ben' li ben' shao'. Kayaadia shi yiyanji to ben' izani kwine' guete' lwaa to ben' wen. ⁸ San Chioza' bli'e ka chakile' cho' daa bzanile' Crítona' wite' ni checho kana' ni nakcho ben' saaxya. ⁹ Daa blalj xchen Crítona' wite' ni checho, ba biyon Chioza' cho' ben' li ben' shao' lawe'na'. Na' daa wite' ni checho, alechlin ki yisle' cho' lao yel' zak'zi'na' kat' illin lla wchoglo Chioza' che yog^{lol} ben'? ¹⁰ Shi kana' chakzbanicho Chioza', bselee Xiñe'na' wite' ni checho kwenche bizoalenchone' wen, alechlin naa ba bisbane'ne' ladji ben' wetka' ki yisle' cho' daa ba zoalenchone' wen? ¹¹ Na' aga diika'z chibaicho, san lekza' daa nombia'cho Chioza', la' ni che Xancho Jesucristonan' bizoalenchcho Chioza' wen.

¹² Ni che yel' widenag che toz benaan golj wxe saaxyana' yell-lioni, na' ni che saaxyana' wyoo yel' wita'. Ka' gok wzolo chet yog' ben', la' yog'zə ben' chongake' dii mala'. ¹³ Kana' zi' we' Chioza' dii Moiséza' ley che'na', ba chonkzə ben' yell-lioni dii mala'. Per shi bibi ley de, aga bi de dii gawan xya chegake'. ¹⁴ La'kzi aga bi ley got' dii gawan xya

chegake', yel' wita' wñabia'n lao yog'lol ben'ka' ben dii mala' wzololenzan dii Adánna' bllinten kana' wban dii Moiséza', la'kzi bi wdishjgake' cho'a xtill' Chioza' ka ben dii Adánna'. Ni che dii Adánna' wyoo yel' wita' yell-lioni, san Jesucrístona', beena' wloo Chioza' xnezin wselee kani'teyi, bxie' yel' mban zejli kanji.

¹⁵ Per ka nak dii mala' ben dii Adánna', bi gak wsaklebichon ka dii wanna' ben Chioza' checho, dii xen wal nlla'n. Daa bxinj blen dii Adánna' yog'zə ben' chet, san daa bsel' Chioza' Jesucrístona' kwenche wite' ni checho, bene' to dii wen inleb che yog' ben' gonlilalleene'. ¹⁶ Bi gak wsaklebicho daa ben dii Adánna' kon yel' goklen daa ben Chioza' checho. La' wchogbia' che yog'lol ben' guetgake' ni che toz dii mala' daa ben dii Adánna'; san yel' goklen che Chioza' daa chone' checho chiyone' cho' ben' li ben' shao' lawe'na', la'kzi nakcho ben' saaxya nlleb. ¹⁷ Shi yel' wita' wñabia'n daa bxinj blen dii Adánna', alechlin ki inabia' ben'ka' ba biyon Chioza' ben' li ben' shao' daa nake' ben' wen inleb, ni che Jesucrístona', beena' be' to yel' mban kob chegake'?

¹⁸ Dii mala' ben dii Adánna' benan ka bchoglo Chioza' che yog' ben' guetgake', na' ka'kzə dii wanna' daa ben Jesucrístona' benan ka yog' ben'ka' gonlilall'gake'ne' yiyakgake' ben' li ben' shao' na' gat' yel' mban chegake' daa bi te cheyin. ¹⁹ Daa gok dii Adánna' widenag, wchoglo che yog' ben' nakgake' ben' saaxya, per daa gok Crítona' ben' wizoa dill', ben' zan yiyak ben' li ben' shao'.

²⁰ Chioza' bi'e ley che'na' kwenche wyanch xtol' ben' yell-lioni daa bi bzenaggake' cheyin. Per la'kzi

wyanch xtooleeka', Chioza' bli'che' yel' chiyesh'lallii che'na'. ²¹ Na' daa chet yog' ben', chli'n saaxyana' napan yel' wak wsi wchogan cho'. Per lekzka' yel' chiyesh'lallii che Chioza' chli'n napan yel' wak yiyonan cho' ben' li ben' shao' na' goñan yel' mban checho zejli kaní ni che Jesucristona', beena' nak Xancho.

6

¹ ¿Beran inacho naa, lla? ¿Agonchcho saaxyana' kwenche wli'ch Chioza' yel' chiyesh'lallii che'na'? ² ¡Aga kan' goncho! La' cho' ba nakcho ka ben' ba wit lao saaxyana' daa bich chnabi'an cho'. Daan, bich chiyal' gonchon txen. ³ ¿Abi nezile ka wchoacho nisa' daa nakcho Cristo Jesúza' txen, lekzka' zejin witlenschonen'? ⁴ Daa wchoacho nisa' zejin witlenchone' na' bgash'lenchone' kwenche gat' to yel' mban kob checho ka gok che Crítona' kana' bisban Xacho Chioza' le' kon yel' wak xen che'na'.

⁵ Na' daa ba witlenchone', ka'kzan yibanco ka bibane' ladji ben' wetka'. ⁶ Nezicho yel' mbanna' nsa'cho kana', wlliayi'n ka wit Crítona' lee yag crusa' kwenche bich we'cho cho'a xbayi beli chenna' na' bich inabia' dii mala' cho'. ⁷ La' kat' to ben' ba wite', bich chnabia' dii mala' le'. ⁸ Na' shi ba witlencho Crítona', ba nxenlall'cho lekzka' ibanlenchone'. ⁹ Nezicho biban Crítona' ladji ben' wetka' na' bich guete' dii yoblə, la' bich so saki yel' wita' le'. ¹⁰ Na' ka wit Crítona', shlin shluxjzan bsol bnite' yel' wak che saaxyana'. Na' daa mbanle naa, zoe' chone' ka cheeni Chioza'. ¹¹ Na' ka'kzə le', chiyal' gakbe'ile ba nakle ka ben' ba wit lao saaxyana' daa bich chnabia'n le', per mbanle lao

Chioza' na' zoale chonle ka cheenile' daa nakle
Xancho Cristo Jesúza' txe.

¹² Daan bi chiyal' we'le latj inabia' dii mala' le' kwenche we'zle cho'a xbayi beli chen chelena' daa ile'i yel' wita'. ¹³ Bi chiyal' gon kwerp chelena' lall' na' saaxyana' kwenche gonle dii mala', san chiyal' gon kwinle do ka nakle lall' na' Chioza' kwenche gonle ka cheenile'. La' wak inacho Chioza' ba bisbane' le' ladji ben' wetka' daa ba bene' le' to yel' mban kob. ¹⁴ Bich chiyal' inabia' dii mala' le', la' bich zoale xni'a leya', san daa biyesh'lallii Chioza' le', ba zoalenle yel' goklen che'na'.

¹⁵ ¿Nakrazə, lla? Naa ba biyesh'lallii Chioza' cho', na' bich zoacho xni'a leya', ¿agonchcho dii mala'? jBi chiyal' goncho ka! ¹⁶ Nezkzile shi ba ben kwincho lo na' ben' kwenche goncho bittez daa ne', choe'cho latj chnabi'e chon'. Ka'kzan, shi chzenagcho che dii mala', na' inabia'n cho' na' wliayi'n cho'. Na' shi we'cho latj inabia' Chioza' cho', wiyone'cho'ben'li ben'shao'. ¹⁷ Per choxken Chioza', la'kzi kana' wñabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'. ¹⁸ Naa ba biyell bila'le lao dii mala', na' ba biyakle lall' na' Chioza' kwenche gonle ka cheenile'. ¹⁹ Ba bi'a dill' che daa chak checho cho' benech kwenche shajniile dga nia' le'. Kana' ben kwinle lall' na' saaxyana' len dii zbanka' cheeni beli chen chelena' kwenche benle dii malka'. Na' naa, li gon kwinle lall' na' Chioza' kwenche soale gonle ka cheenile'.

²⁰ Shlak be'le latj wñabia' dii mala' le', aga bzenagle che Chioza' na' bi benle ka cheenile'. ²¹ Na' aga bi banez wxi'le che dii mala' benle na' naa chiyii

chido'lenile'n, la' yel' witchokzan nsa'n. ²² San naa ba bisell bila' Chioza' le' lo ni'a na' dii mala' na' ba chonle ka cheenile', de banez cheinyin daa zejch chonle daa nak wen, na' gat' yel' mban chele zejli kañi. ²³ Laxj beena' chon saaxyana' nakan yel' wit, san daa chzani Chioza' wi'e beena' gonlilallee Xancho Cristo Jesúza' nakan to yel' mban zejli kañi.

7

¹ Le' ben' bish' na' le' ben' zan', nombia'le leya' na' nezile leya' chnabi'an ben' shlak mbane'. ² Na' ka nak leya', cho'en dill' nan noola' nshagna' chiyal' soalene' ben' che'na' shlak mbane', per shi guet ben' che'na', wak yikee ben' yoblə. ³ Shi lljsoalene' ben' yoblə shlak ni mban ben' che'na', nakan xya. Per shi ba wit ben' che'na', leya' nan wak yikee ben' yoblə, na' bi nakan xya.

⁴ Na' ka'kzan chele le', nakcho txen nonlilall'cho Crítona', le' ben' bish'dawaa na' le' ben' zandawaa. Daa nonlilall'le Crítona', beena' wit ni checho, zejin lekzka' ba nakle ka ben' ba wit lao leya' na' bich chnabi'an le'. Na' naa ba biyakle lall' na' ben' yoblə, beena' wite' na' bibane' ladji ben' wetka', kwenche goncho ka cheeni Chioza'.

⁵ Kana' wzoacho be'cho cho'a xbayi beli chenna', leya' wloochan ltip beli chen chechoka' na' benchcho dii mala', na' saaxyana' daa bencho bsa'n yel' wit. ⁶ Per naa, ba nakcho ka ben' ba wit lao leya' daa btakw bchejan cho', na' ba biyell bila'cho kwenche goncho ka cheeni Chioza' daa ba bikob Espíritu Sántona' yichjlall'do'choni, na' bich chnabia' leya' cho'.

⁷ Bi chiyal' inacho leya' nakan dii mal. La' lennan' bzajniin nad' nan malan' chon'. Aga nezid' shi nakan mal selallaa bi de che ben' shel'ka' ki leya' nan: "Bi selaloo bi de che ben'." ⁸ Per dii mala' yoo loo yichjlall'dawaani bchinan dga bllia Chioza' bia' kwenche wloochan ltip beli chen cha'ni na' chiya dii wzelallaa. La' shel' bibi leya' got', bibi de daa inan nakcho ben' wixinj wilén, shel'ka'. ⁹ Kana' bin' inezid' daa na leya', gokid' le wen nsa' cha', per ka wnezid' daa nllia leya' bia', zizikli benz' dii mala' daa wlliayi' nad'. ¹⁰ Daa bllia Chioza' bia' goncho kwenche gaklenan cho' gat' yel' mban checho, bchoglolan cha' nan chiyal' guet'. ¹¹ La' dii mala' yoo loo yichjlall'dawaani bchinan leya' na' wxiye'n nad' kwenche blliayi'n nad'.

¹² Leya' dii licha nakan che Chioza', na' yog' daa nllian bia' nakan dii wna Chioza', nakan dii li dii shao' na' dii wen. ¹³ Leya' nakan wen na' aga lennan' benan ka kwiayaa. San dii mala' yoo loo yichjlall'dawa'nin bchinan leya' daa nak dii wen kwenche blliayi'n nad'. Na' daa nakan ka', ni che leya' bli'lao saaxyana' nakan dii mal inleb.

¹⁴ Nezicho leya' nakan che Chioza', san nad', lega ben' de beli chen chon', na' chnabia' dii mala' nad' daa chon' ka nan. ¹⁵ Bi chajniid' ka chon', la' bi chon' dii wanna' daa cheenid' gon', san dii mala' daa chakzbanid', lelan chonz'. ¹⁶ Na' kat' chon' daa bi cheenid' gon', chakbe'id' leya' nakan wen. ¹⁷ Na' aga inacho nadaan chon' ka', san dii mala' daa daa yoo loo yichjlall'dawaanin chlligaan nad' kwenche chon' dii mala'. ¹⁸ Nad' nezid' aga bi dii wen cheeni beli chenni gonan. Na' la'kzi le lliallaa gon' dii wanna', bi chak gona'n. ¹⁹ Bi chizoid'

gon' dii wanna' daa cheenid' gon', san dii mala' daa bi cheenid' gon', lelan chonz'. ²⁰ Na' daa chon' daa bi cheenid' gon', zejin aga nadaan chona'n, san dii mala' daa chnabia' loo yichjlall'dawaanin chonan daa.

²¹ Chakbe'yenid' la'kzi cheenid' gon' daa nak wen, dii malalə chon'. ²² La'kzi chibayi loo yichjlall'dawaani ley che Chioza', ²³ chakbe'id' de daa chsej chllonan gon' daa nezid' nak wen, la' dii mala' daa chnabia' nad' chtakw chchejan nad' kwenche gon' daa bi nak wen.

²⁴ ¡Le nyesh' chak cha! ¿Notgui yisell yila' nad' lao beli chenni dga ba nchogbia' kwiayi? ²⁵ Cho'a Chioza' yel' choxken daa wit Xancho Jesucrística' na' bisle' nad' lo na' dii mala'. Na' kin chajniida'n: chibaid' gon' ka na ley che Chioza', per beli chen cha'ni chlligaan nad' kwenche gon' dii mala'.

8

¹ Na' naa, bich bi yel' zak'zi' che Chioza' yen ile'i ben'ka' nak Cristo Jesúza' txen, ben'ka' bich chongake' ka na beli chen che'ka', san ba chongake' ka cheeni Espíritu che Chioza'. ² La' daa nonlilall'cho Cristo Jesúza', Espíritu che Chioza' ba bene' yel' mban kob checho, na' daa chnabia' Espírituna' cho', bich chnabia' saaxyana' cho' daa nsa' yel' wita'.

³ Ley daa bzej dii Moiséza' bi gok yislan cho' lao saaxyana' daa choncho ka na beli chenna'. Daan Chioza' bselee Xiine'na' goke' ben' de beli chen ka cho' per bi goke' ben' saaxy, na' wdixje' saaxy chechoka' ka wite' kwenche bich inabia'n cho'. ⁴ Chioza' bselee Críston'a' ni checho kwenche so sakicho goncho wen lawe'na' ka na ley che'na'.

Na' bich soacho goncho ka cheeni beli chenna' san soacho goncho ka cheeni Espíritu che Chioza'.

⁵ Ben'ka' ni chzenag che dii mala' yoo loo yichjlall'do'eka', toz len zegake' wneyi chongake'; san ben'ka' chzenag che Espíritu che Chioza', zegake' wneyi gongake' daa cheenile'. ⁶ Ben'ka' yoo yichjgake' gongake' dii mala', kwiayi'gake'; san ben'ka' yoo yichjgake' gongake' ka na Espíritu che Chioza', gat' yel' mban chegake' zejli kan'i na' soagake' mbalaz. ⁷ Ben'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan. ⁸ Ben'ka' ni chibayi chon dii mala', Chioza' bi chazlallee ka chongake'.

⁹ Per le', bich chzenagle che dii mala' san chzenagle che Espíritu che Chioza', shi ba zoe' loo yichjlall'do'lena'. Na' shi no bi zoa Espíritu che Crítona' loo yichjlall'do'ena', bi nake' lall' na' Crítona'. ¹⁰ La'kzi ba nakan guet kwerp chelena' daa nakle ben' saaxya, per shi nakle Crítona' toz, Espíritu che'na' zoe' loo yichjlall'do'lena' na' dekzə yel' mban kob chele daa ba biyakle ben' li ben' shao' lao Chioza'. ¹¹ Na' shi Espíritu che Chioza', beena' bisbane' Jesúza' ladj ben' wetka', zoe' loo yichjlall'do'lena', Chioza' lekzka' gone' to yel' mban kob che kwerp chelena' daa guet, daa zoa Espíritu che'na' loo yichjlall'do'lena'.

¹² Daan, le' ben' bish' na' le' ben' zan', chonan byen goncho ka cheeni Chioza' na' bi goncho kon daa nazan che beli chenni. ¹³ La' shi we'chcho cho'a xbayi beli chenni, na' guetcho; san shi we'cho latj gaklen Espíritu che Chioza' cho'

kwenche kwej yichjcho dii mala' daa nan goncho, na' gat' yel' mban checho zejli kañi.

¹⁴ Yog' ben'ka' chzenaggake' che Espíritu che Chioza' na' chongake' ka cheenile', legaken' nakgake' xiin Chios. ¹⁵ Cho' ba zoa Espíritu che Chioza' loo yichjlall'do'choni, bich chak checho ka chak che beena' zoa ben' chnabi'ene' na' chall chllebe'ne', san daa zoa Espíritu che'na' loo yichjlall'do'chonan', zejin ba wkaa Chioza' cho' ka xiine'. Na' daa zoalen Espírituna' chon', chak che'chone': "Xadawaa." ¹⁶ Na' Espíritu che'na' lekzka' chzajniile' cho' kwenche chnezicho nakcho xiin Chios. ¹⁷ Na' daa nakcho xiin Chioza', lekzka' wllin lla ikaalencho Crístona' daa gone', la' shi goncho banez yel' zak'zi'ka' ka diika' ben ble'i Crístona', na' gakchone' txen sho'lenchone' balaan.

¹⁸ Na' ka nak yel' zak'zi'ka' chen chle'icho yell-lioni, aga wllinlebin ka balaan xenna' sho'lenchone'. ¹⁹ Na' yog' diika' bxe bsil Chioza' chbezgakan yob illin lla wli'lao ba nakcho xiin Chioza'. ²⁰ La' yog' diika' bxe bsil Chioza' bich nakshao'gakan ka gokgakan dii nech. Na' aga legakannan' goklall'gakan gakgakan ka', la' Chiozan' bllie' bia' gakgakan ka', per lekzka' bene' kwenche chbezgakan yiayakshao'gakan. ²¹ La' wllin lla kat' yog' diika' bxe bsile' bich gakgakan dii kwiayi', san yiayakgakan mbalaz inleeb ka gak checho, cho' nakcho xiine'. ²² Na' nezicho axt naanlla yog' diika' bxe bsile' chak chegakin ka chak che to nool chllagloe' sane' bi'do' che'na'. ²³ Na' aga toz diika' ben Chiozan' chak chegakin ka', ka'kzan chak checho, cho' ba yoocho Espíritu che'na', beena' chon ka noncho lez gonch Chioza'

dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiñe'. ²⁴ Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez. ²⁵ Per shi ni noncho lez ile'icho daa zi' gak, chiyal' gapcho yel' chxenlall' shlak ni chbezcho gakan.

²⁶ Na' lekzka' Espíritu che Chioza' chaklene' cho' choncho daa bi chak goncho. La' aga nezicho nakan chiyal'yen' we'lwillcho Chioza', per kwin Espíritu che'na' chbellyeshee chnabe' checho lawe'na'. Na' la'kzi aga bi dill' chchine', ²⁷ Chioza', beena' nombi'e yichjlall'do' yog'cho, nezile' bin chnab Espíritu che'na' checho. La' daa chaklall' Chiozan' chnabe' checho, cho' nakcho lall' nee.

²⁸ Na' nezicho Chioza' chchine' yog' diika' chen chle'icho kwenche gaklengakan cho', cho' ba chakichone', cho' ba wleje' kwenche gakcho lall' nee kon ka goklallee. ²⁹ Kana' biŋ' soatecho, Chioza' ble'shiile' cho' na' wleje' cho' kwenche yiyone' cho' ben' wen ka nak Xiiñe' Jesucristona', kwenche Jescristona' gake' ben' llialo ladjchoni, cho' nakcho ben' bishee na' ben' zane'. ³⁰ Chioza' wleje' cho' kani'teyi, na' lekzka' gox wñabe' cho' kwenche gokcho lall' nee, na' biyone' cho' ben' li ben' shao' lawe'na'. Na' cho' ba biyone' ben' li ben' shao', ba nakan sho'cho to balaan xen.

³¹ ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gak bi goni cho'? ³² Shi Chioza' axt ni Xiiñe'na' bi biyeshile' san bzanile'ne' wite' ni checho, ¿alechlin ki gone' cho' yog'lol diika' bchebe'? ³³ Aga no gak

gao xya checho lao Chioza', la' len' ba wleje' cho' na' biyone' cho' ben' li ben' shao'. ³⁴ Na' aga no gak wchoglo checho guetcho. La' Cristo Jesúza' wite' ni checho, na' bibantie' ladj ben' wetka'. Na' chi'e kwit de shli che Chioza', chñabe' gaklene' cho'. ³⁵ Aga bi de dii gonan ka bich gaki Críston'a' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbil chdoncho, ni daa bi de xalaancho, ni daa zoacho dii nxoll, wa shi wit ben' cho'. ³⁶ Chak ka na Cho'a Xstill' Chioza' daa na:

Daa chzoanto' xtilloona' toshiizi de dii nxoll chento' witgake' neto'.

Chongakile' neto' ka xil'do'ka', baka' nzoagake' witgake'.

³⁷ Per Críston'a', beena' chakile' cho', chaklene' cho' kwenche goncho gan lao yog'lolte diika' chen chle'icho. ³⁸ Na' daan nezid' aga bi de dii gonan ka bich gaki Chioza' cho': ni yel' wita', ni yel' mbanna', ni anjlka', ni dii xiw'ka', ni daa chak naa, ni daa zi' gaka, ³⁹ ni dii chak gana' zeelo nak sib wal, ni dii chak gana' zeelo nak zitj wal, ni bittez dii yoblə dii bxə bsil Chioza' bi gak gonan ka bich gakile' cho', la' ba bli'e le chakile' cho' daa wit Xancho Cristo Jesúza' ni checho.

9

¹ Daa nonlilallaa Críston'a' cho'a dill' li, na' bi chziyaa. Na' lekzka' Espíritu Sántona' chzajniile' nad' kwenche nezi yichjlall'dawaani dga nia' nakan dii li. ² Le nyesh' zoa' na' toshiizi le chjeli lall'dawaani, ³ na' axt shel' wxe'id' bich gaklen

Crístona' nad' na' kwiayaa kwenche shicholə gaklenan ben' Israelka' ben'ka' nak ben' wlall ɬha' na' ben' bishaa. ⁴ Chioza' wleje' dii xozxto'nto'ka' kwenche noni xiine' neto'. Na' got' to balaan Ɂhegake' daa wzoalene' legake'. B̄chebe' gakgake' yell ɬhe', na' bi'e legake' ley ɬhe'na'. Na' bzajniile' legake' ka chiyal' we'la'ogake'ne', na' dii zan dii b̄chebe' gone' Ɂhegake'. ⁵ Neto' ben' Israel naknto' dia ɬhe dii Abrahama', dii Isaaca' na' dii Jacoba', na' Crístona' lekzka' golje' lo dia chento'na' ka bide' yell-lioni. Na' chiyal' we'la'ochone' zejli kanı, la'len' nake' Chios na' chnabi'e lao yog'lolte dii de. Kan' nakan.

⁶ Na' bi iñacho Chioza' bi bene' ka b̄chebe' gone' chento', san daa gok, aga yog' ben'ka' golj lo dia ɬhe dii Israela' nakgake' dowalj ben' Israel. ⁷ Aga yog' ben' goljgake' lo dia ɬhe dii Abrahama' nakgake' dowalj xiin dia ɬhe'. Chioza' golle'ne': "Xiino' Isaaki gakb' xaxna' yog'lol xiin dia ɬho'ka' zi' zaak." ⁸ Dga chzajniin cho' nan aga ni ɬhe nakgake' xiin dia ɬhe dii Abrahama' nakgake' xiin Chios, san ben'ka' chajle' gone' ka b̄chebe' gone', legaken' noni xiine'. ⁹ Ki nak daa b̄cheb Chioza' gone' ɬhe dii Abrahama', chi'e: "Zi twiz ka ɣaa zaa dii yoblə, na' Sárana' sane' to xiin'o' bi' byo."

¹⁰ Na' aga dgazan. Lekzka' Rebécana' wxane' chop bi'do' ɬhe dii xozxto'nto' Isaaca'. ¹¹⁻¹² Na' kana' zi' galj bi' kweshka', na' ni bin' gongakb' dii wen ni dii mal, Chioza' bshaljlene' Rebécana', golle'ne': "Bi'na' galjə nech wlexj yichjb' lao bi'na' galjə koll'baa." Golle'ne' ka' kwenche chakbe'icho Chioza' chbeje' beena' gak xiine' kon ka ba bllie' bia' gak, na' chaxe' ben'ka' cheenile' gak xiine', ni

bi chone' kwent shi bi ba bengake'. ¹³ Nakan kon ka na Cho'a Xtill' Chioza' daa na: "Gokid' Jacoba', na' bwiyid' Esaúna'."

¹⁴ ¿Bera ka inacho, naa? ¿Awak inacho Chioza' bi chone' wen? ¡Bi nakan ka! ¹⁵ La' Chioza' golle' dii Moiséza': "Beena' cheenid' yiyesh'lallid' na' yiyesh'lallidee, na' beena' cheenid' gaklen' na' gaklenee." ¹⁶ Daan, nezicho aga daa le cheeni ben' gake' xiin Chiozan' kwej Chioza'né', ni aga ni che bi dii chone'n, san Chioza' chbeje'né' daa chiyesh'lallile'né'. ¹⁷ La' Cho'a Xtill' Chioza' cho'en dill' ka golle' faraónna', beena' wñabia' Egíptona': "Bzoa' li' chñabi'o kwenche gon' ka ile'i ben' yel' wak cha'na' na' kwenche gakbe'i yog' ben' lle' doxen yell-lioni nad' nak' Chios." ¹⁸ Na' kan' nakan, Chioza' chiyesh'lallile' ben'ka' cheenile' yiyesh'lallile', na' lekzka' chone' chech yichjlall'do' ben'ka' cheenile' gakgake' ben' widenag.

¹⁹ Na' wnaljo': "Shi choncho kon ka ba nlilia Chioza' bia' goncho, bi gak in'e' napcho dol' lawe'na', la' aga wakə wsej wloncho gak ka cheenile'." ²⁰ Na' shi ka' chakilo', ¿nora nako' wsheshlenzo' Chioza'? Aga wak in'e to yes' yo yeen beena' benan: "¿Biche benzo' nad' ki?" ²¹ La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga llialote, na' sto dii wchine' che bittez.

²² Na' ka'kzə ba ben Chioza'. Ni che dii mala' chon ben' yell-lioni goklallee wliile' legake' yel' chllaa che'na' na' gone' ka wli'lao yel' wak che'na', per wzoile' wdape' yel' chxenlall' che ben'ka' chidol' yel' zak'zi'na', ben'ka' ba nakan kwiayi'. ²³ Na' lekzka', ba bli'e ka liizelozi ben' wen inlleb nake'

daa ba biyesh'lallile' cho' na' bizi'xene' checho, na' biyone' cho' ben^l li ben^l shao' kwenche idol'cho balaan ka yillincho lawe'na'. ²⁴ Na' ba gox wñab Chioza' cho', aga balz neto' naknto' ben^l Israelan', san len bal-le bi nakle ben^l Israel. ²⁵ Chak ka wna Chioza' daa bzej dii Oseaza', daa na:

Ben^lka' bi nak yell cha', yepgakee: "Nakle yell cha'."

Na' ben^lka' bi gokid', yepgakee: "Chakid' le'."

²⁶ Na' latja' gana' golle' legake' bi nakgake' yell che', wsi' ben^l legake' xiiñ Chios yaa Chios ban.

²⁷ Ki wna dii Isaíaza' che ben^l Israelka': "La'kzi shesh shan ben^l Israelka' axt gakgake' ben^l zan ka yox daa chi' cho'a nisdo'na', balchokzgaken' yilagake' kwenche bi kwiayi'gake'. ²⁸ La' Xancho Chioza' lobe' wchogbi'e ka gak che yog' ben^l lle' yell-lioni." ²⁹ Ka bzej dii Isaíaza', kana' wne':

Shel' Xancho Chioza', beena' nak liizelozi ben^l yel^l wak choo yel^l wak xen, bi bkwaane' sto chop dia chechoka',

ba biyol binitcho ka gok che ben^l yell Sodómaka' na' ben^l yell Gomórraka', shel^lka'.

³⁰ ¿Nakra inacho, naa lla? Ben^lka' bi nak ben^l Israel bi wzegake' wneyi kwenche yiyakgake' ben^l wen lao Chioza', per daa benlilall'gake'ne', ba biyakgake' ben^l li ben^l shao' lawe'na'. ³¹ San ben^l Israelka', la'kzi goklall'gake' yiyakgake' ben^l wen lao Chioza' daa zejlengake' ley che'na', bi wxak-gakile'n. ³² Na' ¿bic^lhe bi biyakgake' ben^l li ben^l shao' lawe'na'? Daa bi benlilall'gake'nen'. Kon gokgakile' ina Chioza' nakgake' ben^l li ben^l shao' daa chongake' daa na leya'. Na'ch gok chegake'

ka chak che ben' chjachew' yaj, ³³ yaja' daa chzetz
 Cho'a Xtil' Chioza', daa na:
 Wselaa to ben' yell Siónna',
 na' saklebile' ka to yaj daa chjachew' ben', na' ka
 to yaj dii lljsho'gake' na' ibixgake'.
 Na' beena' wxenilalleene', biga yiyajile' daa
 nxenilalleene'.

10

¹ Na' le' ben' bish' na' le' ben' zan', daa llialallaa
 na' daa chnab' kat' choe'lwill' Chioza' chnabidee
 yisle' ben' wlall cha'ka', ben'ka' nak ben' Is-
 rael, kwenche bi kwiayi'gake'. ² Nez nle'id'
 chegake' zechgagake' wneyi gongake' ka cheeni
 Chioza', toz daa bi nezgakile' nakyen'an cheenile'
 gongake'. ³ Daa bi chajni'gakile' toz Chiozan'
 chiyone' ben' ben' li ben' shao', chaklall'gake'
 yiyon kwingake' ben' wen, na' bi cheengakile'
 gonlilall'gake' Crítona' kwenche yiyakgake' ben'
 li ben' shao' lawe'na'. ⁴ La' daa bid Crítona',
 bene' daa bi gok gon leya', na' yog' ben'ka'
 gonlilall'gake'ne' yiyakgake' ben' li ben' shao' lao
 Chioza'. Na' bich goncho lez daa goncho ka na
 leyán' yiyakcho ben' wen lawe'na'.

⁵ Dii Moiséza' bzeje' ka chiyal' gon ben'ka' zoa
 xni'a leya' kwenche yiyakgake' ben' wen lao
 Chioza', na' nan: "Nottezə ben' chon doxen ka
 na leya' si'e banez yel' mban che'na'." ⁶ Na'
 che ben'ka' nak ben' li ben' shao' lao Chioza'
 daa nonlilall'gake'ne', wne': "Bi sa'lall'zle, iñale:
 ¿Nora gak shaj yabana?", (kwenche gone' ka yetj
 Crítona' yell-lioni). ⁷ "Ni bi iñale: ¿Nora gak yetj
 gana' lle' ben' wetka?", (kwenche lljaleje' Crítona'

ladje'ka'). ⁸ Ki chizna daa bzej dii Moiséza': "Dillaa daa ba wna Chioza' zoalenan le' na' ba yoon cho'a loll'lena' na' loo yichjlall'do'lena", na' lennan' daa choe'lennto' le', nanto' chiyal' gonlilall'le Crístona'. ⁹ Shi wi'o dill' Jesúza' nake' Xancho na' shajli'o do yichj do lalloo nan Chioza' bisbane'ne' ladji ben' wetka', na' yisla Chioza' li' kwenche bi kwiayoo. ¹⁰ La' daa shajle'cho do yichj do lall'chon, yiyakcho ben' li ben' shao' lao Chioza', na' lekzka' daa choe'cho dill' nan Crístona' nake' Xancho, yisle' cho' kwenche bi kwiayi'cho.

¹¹ Cho'a Xtil' Chioza' nan: "Nottez ben' gonlilalleene', biga yiyajile' daa benlilalleene'. ¹² Laa nakcho ben' Israel, laa bi nakcho ben' Israel, Crístona' nake' Xancho, na' chaklene' yog'cho cho' chnabcho yel' goklen lawe'na'. ¹³ La' nottezə ben' inabe' gaklen Xancho Crítona' le', na' yisle'ne' kwenche bi kwiayee. ¹⁴ Per nakra gon ben' inabgake' gaklene' legake' shi bin' gonlilall'gake'ne'? Na' nakra gongake' gonlilall'gake'ne' shi bin' yengakile' xtilleena'? Na' nakra gak yengakile' xtilleena' shi kono zoa chixje'ile'n legake'? ¹⁵ Na' nakra gak soa ben' chixjee xtilleena' shi kono wsel' legake'? Ka na Cho'a Xtil' Chioza': "Mbalaz inleb kat' ila' ben'ka' zidtixje'gake' dill' wen dill' kob che Chioza'".

¹⁶ Per aga yog' ben' Israelka' chzenaggake' dill' wen dill' kob che Chioza'. Chak ka bzej dii Isaíaza', gana' na: "Xan', kono chajle' dillaa daa chyixje'nto'." ¹⁷ Daan, kwenche gonlilall' ben' Crítona' chiyal' yengakile' xtilleena'.

¹⁸ Na' nia': Abin' yengakile' cho'a xtilleenan', lla? Yog'ze' ba bengakile'n! La' cho'a xtil' Chioza'

nan:

Cho'a xtilleeka' chllinan doxen yell-lioni
axt gana' zeelo chiyoll chidon.

19 Na' chiznia', ḡanti neto' ben' Israelan bi wyajni-
into'n, lla? Zajniinto'n. La' dii Moiséza' wdixji'e
daa goll Chioza'ne' che ben' Israelka' kana' wne':
Nad' Chios gon' wen che ben'ka' bi nakgake' yell
cha' kwenche gaklall'le gon' chele ka chon'
chegake'.

Na' gon' kwenche illaale daa chon' wen che ben'
zit'ka' ben'ka' bi napgake' yel' chajnii.

20 Na'tech dii Isaíaza' biyaxjile' wne':

Ben'ka' bi wze wneyi gombia'gake' nad', ben' ka
bembia'gake' nad'.

Na' ben' kwenche ben'ka' bi wyoo yichjgake' nad'
bembia'gake' nad'.

21 Na' dii Isaíaza' lekzka' wdixji'e daa goll Chioza'ne'
che ben' Israelka' kana' wne': “Toshiizi goklal-
laa gaklen ben' widenagka', ben'ka' bi chzoa xtil-
laana'.”

11

1 Na' nia' ḡaba wlej yichj Chioza' yell che'na'
toshiizin, lla? ḡBi nakan ka! La' lekzka' nad'
nak' ben' Israel. Gol' lo dia che dii Abrahama'
na' nak' xiin dia che dii Benjamínna'. **2** Kani'teyi
wlej Chioza' neto' ben' Israel kwenche naknto' yell
che', na' aga ba wlej yichje' neto'. ḡAbi chjtinile
ka na Cho'a Xtil' Chioza' che Elíaza'? nan ka
be'lwille' Chioza' wdawe' xya che ben' Israelka',
chi'e: **3** “Xan', ben' wlall cha'ka' ba betgake' ben'ka'
wdixjee daa gollo' legake' na' ba blliayi'gake' gana'
chzeynto' bayix'ka' chonnto' li'. Stochga nad'

chgaana', na' lekzka' cheengakile' witgake' nad'.”
4 Na'ch Chioza' golle'ne': “Ni nzoa' galla mil ben' Israel, ben' chzenag cha' na' bin' wchek' xibe'ka' lao Baala'.” 5 Na' ka'kzan chak naanlla, zi xonjchga neto' ben' Israel chzenagnto' che'. Na' yel' ben' wen che'na' wleje' neto' gaknto' lall' nee daa nake' ben' chiyesh'lallii. 6 Na' shi yel' ben' wen che'nan' wleje' neto', zejin aga wleje' neto' ni che shi bi dii wennan chonnto'. La' shel' wleje' neto' ni che dii wanna' chonnto', bi nakan to goklen daa bene' chento', shel'ka'.

7 Ben' Israelka' goklall'gake' yiyakgake' ben' wen lao Chioza' tobia'lall'zgake', na' bi gokan, san ben'ka' ba wlej Chiozan' bdol' bllongakile'n. Na' ben'ka' sto, zizikchli gokchgake' ben' widenag.
8 Gok ka na Cho'a Xtill' Chioza' daa na: “Chioza' bchol bnitile' legake' kwenche bi shajni'gakile'. Na' axt naanlla nakgake' ka to ben' bi chen chle'i.” 9 Ki wna dii Davina':

“Yiyakshga lni che'ka' ka to yalj dii wzapan legake', na' ka to dii chgoo chchew'gake', na' sak'zi'gake'.

10 Gakshgagake' ka ben' lchol,
na' toshiizi gak chegake' ka to ben' noa' to dii zii wal.”

11 Na'ch nia': Adaa bi bzenag ben' Israelka' che Chiozan' wchoonlallee legake' toshiizi, lla? Bi nakan ka'! San daa bi bzoagake' xtilleenan', na'chan bisle' ben'ka' bi nakle ben' Israel kwenche ben' Israelka' lekzka' gaklall'gake' yisle' legake'.
12 Shi yel' widenag che ben' Israelkan' benan ka gok wen che ben'ka' bi nak ben' Israel, Alechla ki gakch wen chegake' kat' ben' Israelka' yiy-onlilall'gake'ne'?

¹³ De to dii cheenid' we'len' le' dill', le' bi nakle ben' Israel. Chioza' ba wleje' nad' na' bselee nad' laolena'. Na' do yichj do lallaa chon' dga bene' lall' na' gon', ¹⁴ kwenche shi bal ben' wlall cha'ka' gaklall'gake' gak chegake' ka ba chwiagake' chak chele, na' yilagake' bi kwiayi'gake'. ¹⁵ La' shi daa bzoa Chioza' ben' Israelka' ka'lə, bene' ka ben'ka' bi nak ben' Israel bizoalengake'ne' wen, le mbālaz kat' illin lla yilebe' ben' Israelka' sto shii. La' gak chegake' ka to ben' biban ladj ben' wetka'. ¹⁶ Na' shi lee kwana' chbejcho daa chonicho yetxttil necha' daa choe'cho Chioza', zejin doxente kwana' nakan che'. Na' shi lo yaga' nakan che Chioza', lekzka' xoziinka' nakgakan che'.

¹⁷ Ben' Israelka' zaklebgakile' yag olivo wenna' daa bchogue' bal xoziinka', na' le' bi nakle ben' Israel zaklebile' yag olivo yixaa daa bidee lee yag wenna'. Na' yag wenna' noxaan xozii yag olivo yixaa diika' bidee le'inna' na' cho'en yel' mban chegakan. ¹⁸ Per bi gakile nakchle ben' wench aga ka ben' Israelka', ben'ka' zaklebi xoz' yaga' diika' bchogue'. Bi shep sha'lall'le, la' aga xoz' yagan' cho'en yel' mban cheyin san loinna' choe'n yel' mban che xoziinka'.

¹⁹ Na' wnaljale: "Bchogue' xoziinka' kwenche bidee neto' le'inna'." ²⁰ Lekzile kan' nakan, la' daa bi benlilall'gake' Chiozan', bzoe' legake' ka'lə, na' biyakle lall' nee daa nonlilall'lene'. Daan, bi shep sha'lall'le, san li gall illeb Chioza'. ²¹ La' shi Chioza' bi biyeshile' xoz' yaga' diika' nak dowalj, lekzka' gone' chele shi naa. ²² Li gakbe'i ka ben' wen ben' shao' nak Chioza' na' lekzka' nake' ben' chsak'zi'. La' bsak'zi'e ben'ka' bi benlilall'gake'ne',

na' ba chone' wen chele. Na' gonche' wen chele
 shi gonle ka dii le gonlilall'lene', san shi bich
 gonlilall'lene' lekzka' wzoe' le' ka'lə. ²³ Na' shi ben'
 Israelka' gonlilall'gake'ne', na' yidee legake' sto shii
 lee yaga', la' Chioza' wak gone'n. ²⁴ Na' le' bi nakle
 ben' Israel, wak inacho nakle ka xoz' yag olivo
 yixaa diika' bidee lee yag olivo wanna', la'kzi bi
 nakan dowalj xoziin. ¿Alechlin diika' nak dowalj
 xoziin ki yideen sto shii? Ben' Israelka' nakgake'
 ka xoziin daa nak dowalj, na' aga bi lallj nakan
 yileb Chioza' legake' dii yoblə.

²⁵ Le' ben' bish' na' le' ben' zan', de to dii
 bin' inezile daa bzajnii Chioza' nad', na' cheenid'
 inezilen kwenche bi gakzle ben' cha'sib na' gakzile
 zak'chle ka neto' ben' Israel. La' aga toshiizin gak
 ben' Israelka' ben' widenag, san kat'ka' ba bza'
 ben'ka' bi nak ben' Israel gonlilall'gake' Crístonan',
 bich gak ben' Israelka' widenag. ²⁶ Na' ka illin lla
 gak ka', na'ch yog' ben' Israelka' yiaygake' lall' na'
 Chioza'. Na' gak ka na Cho'a Xtilleena' daa na:
 Yell Jerusalénnna' ichej to ben'
 yisell yilee ben'ka' nak xiiñ dia che dii Jacoba' lao
 dii mala'.

²⁷ Na' dgan chcheb' gon' chegake',
 yizi'xen' saaxyä che'ka'.

²⁸ Na' daa bi bzenag ben' Israelka' dill' wen dill'
 kob che Crítona', bllaa Chioza' legake'. Na' daa gok
 ka' got' latj benlilall'lene', le' bi nakle ben' Israel.
 Per Chioza' ni chakile' neto' ben' Israel daa wleje'
 dii xozxto'nto'ka' kwenche gakgake' ben' yell che'.
²⁹ Na' daa chon Chioza', aga wikwase'n na' bi
 chiyajile' daa chax chñabe' cho'. ³⁰ Kana', le' bi
 nakle ben' Israel, bi bzenagle che Chioza'. Per

naa, daa gok ben' wlall cha'ka' ben' widenag lao Chioza', ba biyesh'lallile' le'. ³¹ Na' daa bi chzenag-gake' che Chioza' naa, chak ka' kwenche wliyi Chioza' legake' nan lekzka' chiyesh'lallile' legake' ka chiyesh'lallile' le'. ³² La' Chioza' bi'e latj yog'lol ben' gokgake' ben' widenag kwenche yog'lolgake' yiyesh'lallile'.

³³ ¡Dii xen inlleb nak yel' sin' na' yel' chajnii che Chioza'! ¡Ni to kono chajnii daa nllie' bia' gak wa daa nllie' bia' gone'! ³⁴ La' "ni to kono nezi daa chza'lall' Xancho Chioza', na' ni to kono gak wzaniile'ne' nakan chiyal' gone'. ³⁵ Biga zoa ben' ba bi'e Chioza' dii naki che' kwenche gone' lez yigoo Chioza' wzon che'." ³⁶ La' len' bxē bsile' yog'lolte dii de na' bllie' bia' chongakan ka chaklallee, na' yog'lol dii de nakan che'. ¡Le' chidolee koochone' balaan zejli kan! Kan' nakan.

12

¹ Na' le' ben' bish' na' le' ben' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenche gakle dowalj ben' wen ka chazlallee, la' kan' chiyal' we'la'ochone'. ² Na' bi gonle txen diika' de lo yellion, san li we' latj yikob Chioza' yichjlall'do'lena' kwenche yilla' yel' mban chelena'. Na' ka' gakbe'ile daa cheenile' gonle. Na' daa cheenile' goncho nakan dowalj dii wen, daa chazlallee.

³ Daa nzoa Chioza' nad' gon' xshine'na', nia' le': Ni tole bi gakile ba nakle to ben' zakii. San li gakbe'i nak nakle lao Chioza' kon ka zej chaklene' le' chonlilall'lene'. ⁴ Ka nak che' kwerp chechoni, dii zan dii nsa'n na' aga toz ka dii chongakan.

⁵ Ka'kzan cho', la'kzi nak zancho, tozan nakcho daa nonlilall'cho Críston'a', na' ndil nllagcho ka ndil nllag diika' nsa' to kwerp.

⁶ Chioza' ba bene' cho' wde wdeli daa gak goncho kon ka chazlallee gon to tocho. Daan, beena' naki che' chixje'ile' ben' daa che' Chioza'n'e', chiyal' wxenilalleene' gaklene' le' gone'n. ⁷ Na' beena' naki che' gaklene' ben', chiyal' gone'n do yichj do lallee. Na' beena' naki che' wli' wsedile' ben' yoblə, chiyal' wli' wsedile' legake'. ⁸ Na' beena' naki che' wtipe' lall' ben', chiyal' wtipe' lall'gake'. Na' beena' naki che' izanile' bi wi'e ben', chiyal' wi'en do yichj do lallee. Na' beena' naki che' gak kwee xnezi dii chak che ben', chiyal' gone'n xochi ga zeelo gake'. Na' beena' naki che' yiyeshile' ben', chiyal' yibaile' gaklene' ben'.

⁹ Li gaki ljwell-le do yichj do lall'le. Li gakzbani dii mala' na' li soa gonle dii wenna'. ¹⁰ Li gaki ljwell-le ka bish' goljle, na' ganga goni ljwell-le ka ben' zak'chi ka le'.

¹¹ Bi wshe'lall'le gonle daa cheeni Xanchona', san li gon ka dii le gonle daa chazlallee axt ga zeelo soile.

¹² Li yiba yizaki daa nonle lez lljazoalenle Chioza', li gap yel' chxenlall' kat' zaak yel' zak'zi'ka', na' li we'lwill Chioza' toshiizi.

¹³ Le' nakle lall' na' Chioza', li gaklen ljwell-le shi bi dii chyalljile. Na' li we' ben' ga yigaangake' loo yoo lill-le.

¹⁴ Chiyal' inabile Chioza' gak wen che ben'ka' chsak'zi' le'. Li inab gak wen chegake' na' bi chishjle bia' blag' chegake'.

15 Li yiba yizakleni ben'ka' chiba chizaki na' li kwell-len ben'ka' chbell.

16 Li soalen ljwell-le wen. Bi gakle ben' cha'sib, san li gon txen ben' yesh'do'ka'. Na' bi gon kwinle ka to ben' sin'.

17 Shi ga zoa ben' chone' mal chele, bi yizi'le wzonna'. Chiyal' sho' yichjle gonle wen lao yog' ben'. **18** Chiyal' gonle axt ga zeelo gakle kwenche soalenle yog' ben' mbalaz. **19** Le' ben' bish' na' le' ben' zan', bi chiyal' yizi'le wzon che ben' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: "Xancho Chioza' ne': Nad' yizia' wzon che ben'ka' chon dii mala'. Na' nad' wsak'zi'gakee." **20** Na' lekzka' nan: "Shi chbil chdon beena' chakzbani li', be' dii yeej gawe'. Na' daa gono' ka', yiyii yido'ile'." **21** Bi we'le latj inabia' dii mala' le', san li gon wen kwenche gonle gan dii mala'.

13

1 Yog'cho chiyal' wzenagcho che ben'ka' chnabia', la' aga bi yel' wñabia' de dii bi nak che Chioza'. Na' Chioza' nzoe' ben'ka' kwenche inabia'gake'. **2** Na' beena' chizoshyi' ben'ka' chnabia', daa nllia Chioza' bia' gonchon chizoshyi'e. Na' ben'ka' chon ka', choglo chegake' sak'zi'gake'. **3** Ben'ka' chnabia', aga zoagake' kwenche wwall wshebgake' ben'ka' chon wenan, san ben'ka' chon malan chiyal' gall illebgake' legake'. Shi chall chllebo' ben'ka' chnabia', ben wen, na' inegake' wen cho'. **4** La' Chioza' nzoe' ben'ka' chnabia' kwenche soacho mbalaz. Per shi bi chono' wen, na'chan sho' shebo', la' aga zoaxenzə ben'ka' chnabia'n, san Chiozan' nzoe'

legake' kwenčhe wsak'zi'gake' ka chiyali beena' bi chon wen. ⁵ Daan, chonan byen wzenagcho che ben'ka' chñabia', aga kwenchezä bi wsak'zi'gake' chon', san daa nezicho chiyal' goncho wenan. ⁶ Na' lekzka' chiyal' we'cho daa chidol'cho chixjcho, la' Chioza' nzoe' legake' kwenčhe chñabia'gake', na' lennan' noni xshingake'.

⁷ Na' chiyal' yiyixjcho che yog' ben' shi bi chbag'cho chegake'. Shi chal'cho daa chčhixj ben'ka' chñabia' cho', chiyal' chixjchon. Na' beena' chiyal' idap balaan, chiyal' gapchone' balaan. Na' beena' chidol' sho'e balaan, chiyal' koochone' balaan. ⁸ Bi chiyal' ibag'cho che ben', san daa chiyal' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'. ⁹ Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selalloo bi de che ben'." Yog'kzä diikin ba choncho lente yog' diika' sto nllia leya' bia' shi ba choncho dga na: "Chiyal' gaki bish' ljwello'na' ka chaki kwino'." ¹⁰ Shi ba chakicho bish' ljwellchona', bibi dii mal gonichone'. Daan, ba choncho doxen ka nllia leya' bia' shi ba chaki ljwellcho.

¹¹ Li gakbe'i ka nak llaki zoacho ñaa. Ba gol' goncho ka dii le na' bich gonzcho ka ben' ches, la' gaoch ba zoa yisla Chioza' cho' lao dii mala' aga ka kana' zi' wyajle'cho cho'a xtilleena'. ¹² Ba zoa gao te che yell-lioni gani chñabia' dii mala' daa zaklebi yel chóla', na' ba zoa gao ile'icho beeni' che Chioza'. Daan, chiyal' kwej yichjcho dii mala' na' soacho goncho dii wanna' lega ben' yoo beeni' che Chioza'. ¹³ Chiyal' wsa' checho wen, ka ben' chda

tella. Bi chiyal' goncho txen ga cheej chao ben' na' chzoll chnitgakile', ni bi chiyal' talencho xiin xool ben' wa xiin xyo ben', ni bi chiyal' goncho bichlə daa nak zban. Na' bi chiyal' gakdil-lencho ben', ni bi chiyal' gakcho ben' xe'. ¹⁴ San chiyal' gon kwincho lall' na' Xancho Jesucrístona' na' koo yichjcho wsa' checho ka chazlallee na' bich secho wneyi we'cho cho'a xbayi beli chenni.

14

¹ Li gap yel' chxenlall' che beena' bin' gakcha, na' bi gakdil-lenlene' ni che diika' bi nak dii llialo. ² La' bal ben' chakgakile' nakkzan wen gaogake' bittezə yel' wao, na' zi bale' chakgakile' chiyal' gaogake' shgal' yix' kwan. ³ Beena' cheej chao bittezə, bi chiyal' gonile' nakzi beena' bi cheej chao yog'lol. Na' beena' bi cheej chao yog'lol, bi chiyal' gakile' beena' cheej chao bittezə bi chone' wen. La' Chioza' ba noni xiine' choptegake'. ⁴ ¿Nora nako' li' wwia wyizo' nak chon wen llin che ben' yoblə? Toz xane'nan' nezile' shi chone' wen wa bi chone' wen. Na' wzakkzile' gone' ka chiyal', la' Xanchona' nape' yel' wak kwenche gone' ka soachech xiine'ka' gongake' ka cheenile'.

⁵ Na' nit' ben' chakgakile' zoa lla nakchan lla choo lla xench aga ka lla yoblə. Na' lekzka' zoa ben' chakgakile' toz ka nak yog'te llaka'. To to ben' chiyal' soe' do yichj do lallee gone' ka chakile' nakan wen. ⁶ Na' beena' chaki zoa lla nakan lla choo lla xench aga ka lla yoblə, chbeje'n kwenche kwee Xancho Crístonan' balaan. Na' beena' chaki toz ka nak yog'te llaka', lekzka' Xancho Crístonan' chgwee balaan daa chakile' ka'. Na' beena'

chao bittezə, chgwee Xanchona' balaan, la' cho'e Chioza' yel' choxken kat' chawe'n. Na' beena' bi chao yog'lol, lekzka' chgwee Xancho Críston'a' balaan, la' lekzka' cho'e Chioza' yel' choxken kat' chawe'.

⁷ Ni tocho bi chiyal' secho wneyi che kwinzcho. Shi mbancho wa shi guetcho chiyal' secho wneyi daa cheeni Críston'a'. ⁸ Shi mbancho na' goncho ka sho' Xancho Jesucristona' balaan, na' shi guetcho na' guetcho ka sho'e balaan. La', laa mbancho wa ba witcho, lall' na' Xanchona'kzan nakcho. ⁹ Críston'a' wite' na' bibane' ladj ben' wetka' kwenche gake' Xan yog'lol ben', ka ben' mban na' ka ben' ba wit.

¹⁰ Bi chiyal' yiya yiyiljcho bish' ljwellchona', ni bi chiyal' gonichone' nakzi. La' yog'lolcho lljazecho lao Chioza' kwenche wchogloe' che to tocho.

¹¹ Cho'a Xtill' Chioza' nan:

Xancho Chioza' ne', dii li zoakz' nad', na' dii li yog' ben' wchek' xibe'ka' lawa'ni,
na' yoguee we'gake' dill' nan nad' nak' Chios.

¹² Na'chan to tocho yidecho kwent lao Chioza' che diika' bencho.

¹³ Daan, bich chiyal' yiya yiyilj ljwellcho. San wsak'cho bi goncho bittezə dii gonan ka ixop bish' ljwellchona' gone' dii mala' wa gakchoplallee.

¹⁴ Daa bzajnii Xancho Jesúza' nad', nezid' aga bi yel' wao de dii chxinj chlenan cho', lete shi to ben' chakile' de yel' wao dii chxinj chlenan yichjlall'do'ena', bi nakan wen gawe'n shi naa. ¹⁵ Na' shi daa cheej chawo' chonan ka chakchoplall' bish' ljwello'na', aga chakilo'nen' shi ni cheej chaozo'n. Bi chiyal' yeej gawo' daa gonan ka kwiayi' beena' wit

Crítona' ni che'. ¹⁶ La'kzi chonle bittezə dii chakile nakan wen, bi chiyal' gonchlen shi chonan ka ina ben' yoblə aga wenan chonle. ¹⁷ La' shi ba chñabia' Chioza' cho', diika' cheej chaocho bi nakan dii llialo, san dii llialo yiakcho ben' li ben' shao' na' soalen lwellcho mbalaz, na' soacho yiba yizakicho daa zoalen Espíritu Sántona' cho'. ¹⁸ Na' shi zoacho choncho diiki chazlall' Crítona', na' yibayi Chioza' ka choncho na' lekzka' ben' yell-lioni inagake' choncho wen.

¹⁹ Daan, chiyal' goncho to dii byen soalen lwellcho mbalaz na' gakchachcho ganga. ²⁰ Bi yeej gaocho to dii gonan ka yinit dii wenna' ba ben Chioza' checho. Dii li, yog' diika' cheej chaocho nakgakan wen, san bi nakan wen yeej gaocho to dii chonan ka gakchoplall' ben' yoblə. ²¹ Wentelan bi gaocho belaa ni bi yeejcho vinona', ni bi gonzcho bittezə dii gonan ka gakchoplall' bish' lwellchoka'. ²² Chiyal' inezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa nezile' nak wen. ²³ Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

15

¹ Na' cho' ba zoachechcho chonlilall'cho Chioza', chiyal' gapcho yel' chxenlall' che ben'ka' bin' gakcha, na' bi chiyal' gonzcho daa cheenzicho goncho. ² To tocho chiyal' goncho dii gaklenan bish' lwellchoka' kwenche gakchagake'. ³ La' Crítona' aga bene' daa wyazlall' to kwinze', san gok che' ka na Cho'a Xtil' Chioza', daa na:

"Daa wchell wñe ben' cho' bzoazi'yaagakan nad'."

⁴ Na' yog' diika' na Cho'a Xstill' Chioza' bzej-gake'n kwenche wzajniin cho' na' wtipan lall'cho kwenche gapcho yel' chxenlall' lao diika' chen chle'icho na' goncho lez dii wanna' ba bçheb Chioza' checho. ⁵ Chioza', beena' chon cho' yel' chxenlall' na' chtipe' lall'cho, gaklenshgue' le' soalen ljwell-le wen kon ka bli'yi Cristo Jesúza' cho', ⁶ kwenche yog'le gakle toz we'la'ole Chioza', beena' nak Xa Xancho Jesucrítona'.

⁷ Daan, li wleb ljwell-le, ka ben Crítona' blebe' le' bénlene' txen, kwenche koole Chioza' balaan. ⁸ Na' nia' le', Crítona' bide' kwenche gaklene' neto' ben' Israel, kon ka bçheb Chioza' lao dii xozxto'nto'ka' kwenche inezinto' chone' kon ka chchebe'. ⁹ Na' lekzka' bide' kwenche ben'ka' bi nak ben' Israel we'la'ogake'ne' daa chiyesh'lallile' legake'. Chak ka na Cho'a Xstill' Chioza' daa na:

Daan, we'lawaa li' ladji ben'ka' bi nak ben' Israel, na' gol' inia' we'lawaa li'.

¹⁰ Na' gan yoblə chiznan:

Le' bi nakle ben' Israel, li yibaleni neto' naknto' yell che'.

¹¹ Na' lekzka' gan yoblə chiznan:

Yog'le le' bi nakle ben' Israel, li we'la'o Xancho Chioza'.

Le' lle'le yog'te yell, li gol inie'.

¹² Na' lekzka' dii Isaíaza' bzeje' daa na:

Ka to yag dii chigaa, ka' yiak xiin dia che dii Isaína',

daa galj to ben' inabi'e ben'ka' bi nak ben' Israel, na' gongake' lez gaklene' legake'.

13 Chios, beena' noncho lez gone' wen checho, gonshgue' ka yibaile na' soale mbalaz daa nonlilall'lene, kwenche zizikli gonchlene' lez daa zoalen yel' wak che Espíritu Sánto che'na' le'.

14 Le' ben' bish'dawaa na' le' ben' zandawaa, nezyenid' le ben' wen nakle na' le ba chajniile, na' ba chak wzajnii Ijwell-le. **15** Na' lee yishi ba biyaxjid' bzej' le che bal diika' bi chiyal' guet-lall'le, la' chaklen Chioza' nad' kwenche **16** chon' xshin Jesucrística' ladj ben'ka' bi nak ben' Israel. Na' llinni chon' nakan ka xshin bxoz, beena' chjwa' lao Chioza' diika' bibi nda' nchen. La' daa choe'len' legake' dill' wen dill' kob che'na' kwenche gonlilall'gake' Crística', na' yixis yihib Espíritu Sántona' yichjlall'do'eka', na' gakgake' lall' na' Chioza', wak inacho nakgake' ka to dii bibi nda' nchen daa chzanid' wi'ane'.

17 Daa chaklen Cristo Jesúza' nad', chibaid' cho'a dill' chon' xshin Chioza' daa bene' lall' na'. **18** Aga wiyaxjid' wi'a dill' che bichlə dii ba ben', san cho'a dill' ka ba bchin Crística' nad' kwenche zan ben'ka' bi nak ben' Israel chzenaggake' che'. Bchine' diika' wnia' na' diika' ben' **19** kon yel' wak che Espíritu che'na' kwenche gok diika' ben ble'i ben' na' wyajle'gake'. Wzoloz' Jerusalénnna' na' wya' axt doxen gana' mbaní Ilíricona' be'len' yog' ben' dill' wen dill' kob che Crística'. **20** Na' ben' byen jtixji'a dill' wen dill' kob che'na' gana' konon' inezin, kwenche bi jachish' jalán' xshin ben' yobla. **21** San kon ka na Cho'a Xtil' Chioza', gana' nan:

Ben'ka' bin' gombia'gake' xtilleena', gom-bia'gake'n,

na' ben'ka' bin' yengakile' xtilleena',
shajni'gakile'n.

²² Na' ni che llin dga chon' bin' gak yid' gana' zoale, la'kzi zan shii ba goklallaa yidwia' le'. ²³ Per naa ba biyoll ben' xshin Chioza' doxen gani chda', na' chakid' wak yidwia' le', la' kana'te chaklallaa yid'. ²⁴ Cheenid' tia' gana' zoale kat' sha' Espáñana', la' cheenid' ile'id' le', la'ch' shloll, kwenche soacho mbalaz. Na' chbez' gaklenle nad' kwenche gak kooch' nez. ²⁵ Per naa, yiaya Jerusalénnna' lljasan' dii chyallji ben' bish'choka' lle' na'. ²⁶ La' ben'ka' choe'la'ogake' Crítona' Macedóniana' na' Acáyani do yichj do lall'gake' ba btopgake' mech dii wsel'gake' che ben' yesh'do'ka' len ladj ben'ka' nonlilall' Crítona' Jerusalénnna'. ²⁷ Do yichj do lall'gake' chaklall'gake' gaklengake' legake', na' dii li nakan to dii chiyal' gongake', la' lengake' ba naki chegake' dii wenka' ba bcheb Chioza' che neto' ben' Israel, na' chiyal' yigoogake' wzon che ben' Israelka' we'gake' daa chyalljgakile'. ²⁸ Na' ka yiyyoll lljasan' mech i dga bengake' lo na', na' kwaa nez sha' Espáñana' na' tia' yidwia' le'. ²⁹ Na' nezid' kat' yidwia' le', dii xen inlleb gaklen Crítona' cho'.

³⁰ Le' ben' bish' na' le' ben' zan', daa nonlilall'cho Xancho Jesucrítona' na' daa chon Espíritu Sántona' ka chaki ljwellcho, chat'yoid' le' gakle nad' txen inabgachile Chioza' gaklene' nad' lawi diika' chdil chllag'. ³¹ Li inabi Chioza' yisle' nad' lo na' ben'ka' bi chonlilall'gake' Crítona', ben'ka' lle' gana' mbani Judeana', na' lekzka' li inabile' sho'lall' bish' ljwellchoka' lle' Jerusalénnna' dga lljasan' chegake', ³² kwenche zoa' mbalaz yidwia' le', shi Chioza' gone' latj, na' yiyyakshao'lalla daa soacho txen.

³³ Na' Chioza', beena' chon ka zoacho mbalaz, soalenshgue' yog'le. Ka' gakan.

16

¹ Cheenid' gombia'le ben' zanchona' le Febe, beena' zoa chaklene' bish' ljwellchoka' nonlilall' Jesucristona' yell Cencreana'. ² Daa nonlilallee Xancho Jesucristona', wlebgachlene' do yichj do lall'le kat' yide' gana' zoale, la' kan' chiyal' goncho, cho' nakcho lall' na' Chioza'. Na' gaklenlene' shi bi dii chyalljile', la' len' ba goklene' zan bish' ljwellchoka' na' lentia' ba goklene'.

³ Li wwapgach chiox Priscílana' len ben' che', Aquílana', ben'ka' chonlengake' nad' xshin Cristo Jesúza'. ⁴ Legake' bzoa dii nxoll yel' mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' ben'ka' bi nak ben' Israel, ben'ka' ba nonlilall' Crítona' to to yell gana' jtixji'a xtilleena'. ⁵ Na' lekzka' li wwapgach chiox ben'ka' chdop chllag choe'la'ogake' Crítona' lille'ka'. Na' wwapgachle chiox Epenétona', beena' le chakid', beena' gok ben' nech benlilallee Crítona' gana' mbani Ásiana'. ⁶ Li wwapgach Maríana' chiox, la' le ba bilal bizodile' kwenche goklene' le'. ⁷ Li wwapgach chiox ben' wlall cha'ka' Andrónicona' na' Júniazza', ben'ka' wyoolen' txen lillyana'. Nechgake' benlilall'gake' Crítona' ka nad', na' mbejlaogake' ladj ben'ka' chjtixjee xtilleena'.

⁸ Li wwapgach chiox Ámpliaza'. Le chakidee daa nake' Xancho Jesucristona' txen. ⁹ Li wwapgach chiox Urbánona', beena' chonlene' neto' xshin Cristo Jesúza', na' Estáquiza', beena' le chakid'. ¹⁰ Li

wwapgach chiox Apéleza', beena' ba bli'e chakile' Crítona' do yiçhj do lallee. Na' li wwapgach chiox Aristóbulona' na' ben'ka' nake' txen loo yoo lille'na'. **11** Li wwapgach chiox Herodiónna', beena' nak ben' wlall cha'. Na' lekzka' li wwapgach chiox Narcísona' na' ben'ka' nake' txen loo yoo lille'na', ben'ka' nonlilall' Xancho Jesucrístona'. **12** Li wwapgach chiox Trifénana' na' Trifósana', noolka' chon xshin Xancho Jesucrístona'. Na' li wwapgach chiox Pérsidana', beena' le chakicho, la' le ba bilalile' bene' xshin Xanchona'. **13** Li wwapgach chiox Rúfona' beena' le zoacheche' chonlilallee Xancho Jesucrístona', na' lekzka' xneena', beena' chonile' nad' ka xiine'. **14** Li wwapgach chiox Asíncritona', Flegóntena', Hérnaza', Patróbaza', Hérmeza' na' ben' bish'choka' na' ben' zanchoka' zoalen legake'. **15** Li wwapgach chiox Filólogoña' na' Júliana', na' Nerewa' len ben' zane'na', na' Olímpaza' na' yog' ben'ka' zoalen legake', ben'ka' nak lall' na' Chioza'.

16 Li wwapgach chiox Ijwell-le lega ben' chaki Ijwellin daa nakle Chioza' txen. Yog' ben'ka' nonlilall' Crítona' yellka' gana' ba wy'a chwapgake' le' chiox.

17 Le' ben' bish' na' le' ben' zan', li wsak' bi wzenagle che ben'ka' chon ka chak ben' choplə, na' gongake' ka gakllejile che dill' lina' ba nse-dle. Bi gonle legake' txen. **18** Ben'ka' chon ka' aga chongake' ka cheeni Xancho Jesucrístona', san chongake' daa nazan chegake'. Na' choe'la'o choe' dill'gake' na' choe'gake' dill' goll-lall' kwenche chonllej chongangakile' ben'ka' chajle'daz. **19** Yog'te ben' ba nezgakile' nakle ben' wizoa dill', na' le chiba chizakid' ka chonle. Na' cheenid' gakle ben'

sin' kwenche gonchle diika' nak wen na' bibi dii mal gonle. ²⁰ Na' Chioza', beena' chon ka soacho mbalaz, lii wlliyai'tie' yel' wak che Satanáza' na' gone' ka wlej wshoshjlen. Xancho Jesucristona' gaklenshgue' le'.

²¹ Timotewi, beeni chonlene' nad' xshin Chioza', chwape' le' chiox na' lekzka' Lúcioni, Jasónni na' Sosípateri, ben'ki nak ben' wlall cha'.

²² Nad', Tercio, chzej' dga na Pábloni, na' lekzka' chwap' le' chiox daa nakcho Xancho Jesucristona' txen.

²³ Na' Gáyoni chwape' le' chiox, beeni noné' lille'ni zoanto', na' lekzka' lille'ni no'en kwenche chdop chllag ben'ki choe'la'ogake' Crítona'. Na' Erástoni, beeni ngoo lo nee mech che yelli, chwape' le' chiox, na' lekzka' bish' ljwellchoni le Cuarto.

²⁴ Xancho Jesucristona' gaklenshgue' yog'loltele. Kan' gakan.

²⁵ Chiyal' we'la'ocho Chioza', beena' wak gone' ka soachechle gon'lilall'lene' daa wyajle'le dill' wen dill' kob che'na' daa chyixji'a, daa chzajniin cho' che Jesucristona'. Nakan daa kono wnezi kani'teyi,

²⁶ per naa, Chios, beena' zoa zejli kani, chaklallee inezichon, na' ba bene' ka chajniicho diika' bzej dii ben'ka' wdixjee daa golle' legake' kani'yi kwenche yog' ben' lle' doxen yell-lioni shajle'gake'n na' wzenaggake' cheyin.

²⁷ Toz Chioza' zeelo nake' ben' sin'. Na' chiyal' koochone' balaan zejli kani daa bselee Jesucristona'. Kan' nakan.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

f98bf0c8-4467-559d-82ab-96644a44d38f